

Date – 28/03/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Sorkar ruahman Faina Hnatlangpui 2026 chu vawiin khan Aizawl Lammual leh a chhehvel bakah Aizawl khawpui chhung YMA branch tam zawkah neih a ni.
2. Khawchin thlirlawktu IMD Aizawl chuan Mizoramah naktip thleng ruah a sur rin a nih thu leh tek a tlak nasat theih thu a sawi.
3. Prime Minister Narendra Modia chuan vawiin khan Noida International Airport thawhkhatna a hawng
4. Prime Minister Narendra Modi chuan Pathianni chawhma dar 11 hian 'Mann Ki Baat' programme a hmang leh dawn.



CLEANLINESS

UD&PA, Aizawl Smart City, AMC leh Central YMA tanghoin, Aizawl Khawpui Faina atana Coordination Committee an buatsaih -Faina Hnatlangpui 2026 chu vawiin khan Aizawl Lammual leh a chhehvel bakah Aizawl khawpui chhung YMA branch tam zawkah neih a ni.

Faina Hnatlangpui tanna hi zing dar 7:30 ah Vanapa hall kawtah neih niin, UD&PA Secy Pu Lalmalsawma Pachuau chuan a hmanpui a. Pu Lalmalsawma Pachuau chuan thu sawiin, ram leh hnam hmangaihna kawngah Faina ngaih pawimawh a tulzia a sawi a. Mizo mipuite chuan mahni ram tia chhal tur an nei chu thil hlu tak a ni tih hriain, a enkawl leh tihfai kawngah pawh mawhphurhna kan la tur a ni, a ti a. Fai chu thil hlawk tak a nih thu sawiin, ram pawn atanga Mizoram lo tlawhtute hiptu pawimawh tak leh ram economic value tisangtu pakhat chu Faina a ni, tih a sawi a. Faina ngai pawimawh zual zel turin kalkhawmte chu fuihin, 'Aizawl Khawpui Faina Hnatlangpui' leh 'City Branch YMA Fai Intihsiak' chu a hawng nghal a ni.

AMC Municipal Commissioner Pu Joseph H. Lalramsanga chuan he hun kaihruaiin, Central YMA General Secretary Prof. Malsawmliana chuan Faina kawnga hmalakna chu mimal intin thleng phak a nih theih nan inzirtirna uar deuh deuh a tul thu a sawi bawka a ni.

Kan corr report ngaithla ang.

VC- Faina Hnatlangpui hawnnaah hian tlawmngai pawl thenkhat leh Department ruat bik ten zingkar hnatlang hi Lammual leh a chhevel-ah an nei nghal a, Aizawl khawpui chhunga YMA branch tam zawkin remchan dan angin mahni veng theuhah Faina Hnatlangpui hi an zawm ve nghal a, chhiat tawhna avang leh rokhawlhna dang avanga YMA Branch hnatlang thei lo an awm bawk a, YMA Branch thenkhat nimin lama hnatlang an awm bawk a ni.

Faina Hnatlangpui pual hian bawlhhlawh tamna leh hmun bal zual lai 15 thlanchhuah niin, a hnaivaia awm YMA branch ten heng hmun tihfai hna hi an thawk nghal a, khua in a zir loh avangin Faina Hnatlangpui hi hmun tam takah a khaihlahk a ni.

He Hnatlangpui hi Comprehensive Plan for Municipal Solid Waste Management in Aizawl tihhlawhtlinna tur pakhat anih bakah Aizawl khawpui hi India rama khawpui fai ber leh bawlhhlawh awmlohna Garbage Free Aizawl kan nih theihna tura hmalakna zinga mi a ni.

(CORR/DIPR)

<><><>

FISH FESTIVAL

Ni 3 awh Champhai khawpui sira Keilunglah tuikhuah a Nghakuai chiah runpui neih chu vawiin khan khar a ni.

Kharna inkhawm hi Fisheries Minister Pu Lalthansangan hmanpuin Mizo-pa thar chhuah ngei hmanga Sangha-a intodelh tumin hma lak mek a ti a, tun dinhmunah Mizorama sangha mamawh za a 24 chauh tharchhuah a ni a, Chief Minister Fisheries Mission kalpui tum hmangin nasa lehzuala sangha tharchhuak tam turin hmalak a ni dawn a ti a CM Special Package hnuaiiah Bana kaih policy hnuaiiah Cheng Nuai 23.8 chuang pekchhuah tawh a niin mi engemawzat hnenah Sangha khawi kawnga hmalakna turin Loan pek tum a ni bawk a ti.

Sangha tharchhuah a lo pun theihna turin Leileta sangha khawi uarin Progress Partnership kalpui tum a ni ti bawk a, hei hi Party bil induhsakna atana hman a ni dawn lova, a thawk peih, thawk nasa leh a ti tak tak tur hnenah chauh tanpuina sem a ni ang a, Minister dawhkan atang ni lovin, Fisheries Department Officer te

kaltlang zela kalpui a ni ang a ti a ni.

Keilunglah tuikhuaha Nghakuai chiah runpui kharna inkhawm hi Pu Lalrothanga, Fisheries Department Secretary in kaihruaiin Sangha man lian ber, sangha man tam ber, Sangha mantu naupang ber, Hmeichhe sangha man tam ber leh Sangha mantu upa ber te hnenah lawmman Minister leh he huna tel Official ten an hlan a ni.

<><><>

AMC

Thla thar ni 21-a vote thlak tura ruahman Aizawl Municipal Corporation (AMC) inthlan atan party hrang hrangten campaign an ngawrh chho hle a,

MNF Party in nimina an party pisa, Mizo Hnam Runa chung inkhawm an neihah an Legal Board Vice Chairman Pu Lalpianfela Chawngthu chuan thu sawiin khawvelah duh hun huna inthlan puang thin sorkar an awm tih sawiin chung te chu ZPM in an entawn a ti a. VC inthlan hun an sawn hnaih thu leh AMC inthlan hun an tih hlat thu a sawi a. Dan awmsa reng palzutin, lalna leh thuneihna an channa tur hun remchang, an chet that hun thlirin mipui an inthlanpui tih a sawi a. Engtiklai pawha kawng tha neih chu mipuite chanvo a ni a, ZPM sorkar hnuaia mahni vengchhung kawng a chhia a nih chuan ZPM vote nawn tuman an ba lo tih a sawi a ni.

Mizoram Pradesh Congress Committee President Pu Lal Thanzara pawhin nimina Friday Political Session an hmanah thu sawiin Assembly Inthlanpuiah an tisual tawh a, AMC Inthlanah Aizawl mipuite chu tisual tawh lo turin a ngen tih a sawi a. ZPM sorkar chuan an intiam ang an ti lo fai vek tih sawiin state sorkarah mipuiten an tifuh tawh lo a, Aizawl khawpui enkawl tur tal chuan tifuh tawh se a duh tih a sawi a ni.

BJP Party in nimina political session an neiha thusawitu Pu Vanupa Zathang chuan BJP Mizoram tan AMC Election chu chona lian tak a ni dawn tih a sawi a. Candidate 11 an nei thei chu lawmawm a tih thu sawiin sorkarna siam thei tur khawp candidate tha an neih thu leh lawmawm a tih thu a sawi bawk a ni.

Register na man chawi ngai lova Health Insurance neih theihna Ayushman Bharat PM-JAY chu Mizo mipuite hriat tlan a pawimawh hle laiin hre lo an tam zawk a, State Sorkar hian mipuite ah zirtirna a pe tam tawh loh vang nge State Health Care Scheme (MUHCS) a sum senga inziak lut an tlem phah a hlau tih hi zawhna a awm thei a ti a, Kum 70 chin chunglam ration card eng pawh neite tana PM Health Insurance Scheme (Aayushman Bharat PM-JAY) cheng Nuai 5 thleng bill theihna a awm a ni tih hriat a pawimawh hle bawk a ni, a ti bawk.



WEATHER UPDATE

Indian Metereological Dept. (IMD), Aizawl Director Pu Sudheer Kumar Dwivedi chuan hmarchhak lama chhum chhah tak satellite atanga an hmuh atangin Mizoramah naktip thlengin ruah a sur an rin thu a sawi a, tek tla a nasa thei bawk a ti.

Akashvani News zawhna chhangin IMD Aizawl Director chuan chhum chhah tak hian hmarchhak state thenkhat Manipur, Meghalaya, Tripura leh Arunachal Pradesh te a tuam thu sawiin a inher danah Mizoram a tuam chho a ti a. Vawiin atanga naktip thleng hian ruah sur bakah tek tla nasa te tun dinhmuna an thlirlawkah a thlen theih thu a sawi a. Ruah erawh a tlak tam lutuk an rin loh thu sawiin mipuite chu khawlaia an kalnaah fimkhur reng turin a chah a ni.

Vawiin bikah hian Mamit, Kolasib, Aizawl, Saitual, Khawzawl, Champhai leh Serchhip district-ah te ruah a tlak beisei a nih thu a sawi a. Naktukah hian Mamit, Kolasib, Aizawl, Serchhip, Lunglei, Lawngtlaiah te ruah a sur dawn bakah tek a tlak

nasat theih thu a sawi a. Naktipah chuan Mamit, Kolasib, Aizawl, Champhai leh Serchhipah te ruah a tlak theih thu a sawi bawk a ni.



HORTI -CHAMPHAI

Champhaia District Horticulture Office huaihawt Unique Selling Proposition (USP) Ginger, Greenhouse Cluster leh Sapthei chin nimin khan hawn a ni a,

Vaphai Community Hall-a he hun buatsaih hmanpuitu Horticulture Minister Pu C. Lalsawivunga chuan sorkarin a market hre sain kuthnathawktute thlai an chintir thu sawiin heti chung a la hlawhtling lo te chu an inenfiah hle a ngai dawn tih a sawi.

Minister chuan sorkarin kuthnathawktute chu eizawna ngelnghet nei tawh se a duh thu a sawi a. Chumi atan chuan sum tam tak sengin project chi hrang hrang a siam tih sawiin heng project tha tak tak te hi hlawhtlin ngei a duh tih a sawi a. Tih tak zetna leh thawh rimna leh taimakna a pawimawh tih sawiin eizawnaah rinawmna a pawimawh hle tih a sawi a. Sawrkar pawhin ruahmanna tha tak tak neiin sum leh pai tam tak a seng tawh naa tuna Mizoram ei leh bar dinhmun erawh chu a la lungawithlak loh hle tih a sawi a ni.

Ministry of DoNER hnuaia Unique Selling Proposition(USP) Ginger Project hnuaiah hian Sawthing sawngbawlna hmun Hub 1 leh Spoke 3 khaw 4-a din tur zingah Vaphaiah hian Spoke din a ni dawn a. Sawthing sil fai, zai lep, tih ro leh powder siam theihna hmun tur a ni dawn a. Greenhouse 25 chu mi 21 hnenah sem chhuah a ni a. Sapthei chingtu mi 40 hnenah tanpuina thei enkawlna tur hmanrua chi hrang hrang sem chhuah a ni bawk.



IWRD

Irrigation & Water Resources Department Secretary Pu Lalrothanga chuan waviin khan Champhai tlawhin IWRD hnuaia Pilot Project kalpui mek Modernisation of Command Area Development (MCAD) hnuaia Water User Society member te nen inkawm.

IWRD Secretary Pu Lalrothanga ho hian he project in a tum angin loneitute'n tui hnianghnar zawka an neih theihna tura ruahmanna te sawiho a ni a. IWRD Secretary hian pump house leh solar plant dahna hmun tur te tlawhin a en fel nghal a. He MCAD project in a tum bulpui ber chu canal hmanga thlai tui pek chu a aia hman tangkai theih zawkna tura tihdan tha, hmanraw tha leh changkang (Pressurized Pipe Irrigation Network) hmanga thlak tum a nih thu a sawi a. Hemi hmang hian tui renchem zawk leh tangkai zawkin a hmantir thei dawn tih sawiin thlai thar chhuah a pun phah tur thu te a sawi bawk a ni.

IWRD Secretary chuan he MCAD project hlawhtlinna tura a bulpui ber chu loneitute (Water User Society member) an nih thu sawiin, project zawh a nih hunah pawh an ta anga enkawl chhonzawm zel turin a chah a, he project huam chhung tui hna kan neih ang ang te ti chhe lo leh ti buai lova hman tangkai dan leh rei tak hman dan in zirtir a theh darh pawimawh zia thu te a sawi a ni. Tuna MCAD Pilot project

hi a hlawhtling anih chuan, a ram pum huapa la kalpui chhoh zel tur anih thu sawiin, hei hian Mizoram, fur laia tui hnianghnar tak, thala tui khamkhawp hmu leh silo tan a tangkai tur thu te a sawi a bawk a ni.

(Dipr)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Chanchinthar hi naktuk zing dar 7 leh a chanve-ah puan leh a ni ang.



PM

Prime Minister Narendra Modia chuan vawiin khan Noida International Airport thawhkhatna chu Uttar Pradesh-a Gautam Nagar district chhung Jewar ah a hawng. Hei bakah hian Acre 40 a zau Maintenance, Repair and Overhaul (MRO) hmunpui dinna tur lungphum a phum bawk a. Thusawiin Pu Modia chuan tun hi Viksit UP , Viksit Bharat campaign neih mekah bung thar kaina anih thu a sawi a. UP chuan ramchhunga state zingah International Airport tamna ber state a ni ta a ti a. He airport thar hian UP khawthlang Agra, Mathura, Aligarh, Ghaziabad, Etawah leh Faridabad te tan hlawkna tam tak a thlen dawn tih a sawi a. Lonietute, industry tenau leh a laihawlte tan remchanna thar a isam sak dawn a. UP khawthlang lama thalaite tan hna tau a tet dawn bawk a ti a. Jewar Airport chu Uttar Pradesh hmasawinna leh than zelna ti langtu a ni ang a ti bawk.

(Newsonair)



PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 132-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

(Newsonair)



COMMERCIAL LPG

Vawiin khan Delhi pana thlawk Indigo thlawhna chu Indira Gandhi International Airport, Delhi ah emergency a tum tir a ni. Thudawn danin he thlawhna hi Visakhapatnam atanga lo thlawk niin a chhungah hian khualzin mi 161 an chuang a. Union Ministry of Civil Aviation sawidanin vawiin chawhma dar 10.39 khan Airport ah hian full emergency puan a ni a. He thlawhna hi him takin chawhma dar 10.54 khan him takin a tum a ni.

(Newsonair)

